

Conflicts cun gidieus e muslims

En ina scola superiura e mercantila da Geneva

DA GUIU SOBIELA-CAANITZ

■ **Al Petit-Saconnex, quartier da Geneva, datti in «collège et école de commerce» (CEC) che porta il num da cuss. naz. André Chavanne (1916–1990), schef dal Departament chantunal d'educaziun da 1961 a 1985. Ils var duamilla scolaras e scholars dal CEC appartegnan a 120 nazions e discurren 80 linguas differentas.** L'intschess genevrin (282 km²) è circumdà da la Frantscha; lezza ha ina populaziun islamica da var 5–6 milliuns olmas ed ina giudaica da 470 000 olmas.

Far patratgar a moda coerenta

L'Israel occupa dapi 1967 la Cisjordania araba cun sia populaziun per gronda part islamica e sia minoritad cristiana. Il conflict dal Proxim Orient viva er en il CEC André-Chavanne. La «Tribune de Genève» online dals 3 da zercladur 2015 rapporta: «Ina docenta dat perditga: 'Jau vesel adina dapli giuvnas cun fazièl da chau (...). Suentar [l'attentat terroristic da Paris cunter] Charlie-Hebdo han insa-quants giuvens laschè crescher la barba sco dschihadists; in d'els ha provocà ina magistra. Lez gniva tard a scola (...) perquai ch'el saja stà a la moschea per urar, scheva'l. Pliras giadas ha'l attatgà verbalmain giuvnas da sia classa cun remartgas sexisticas davart lur vestgadira occidentala' (...). Scolaras e scholars mettan l'instrucziun en dumonda, e la magistraglia vegn adaquella da sa censurar sezza: 'Insa-

quants guntgeschan temas spinus che pudesan vilentar (...). La primavaira 2014 hai dà ina divergenza d'opiniuns relevanta tranter in (...) gimnasiast giudaic da 19 onns e ses docent da geografia (...). La famiglia dal giuven (...) ha crititgà severamain che la materia da l'instrucziun saja da tendenza proaraba, (...) cunzunt davart il conflict tranter l'Israel e la Palestina. Ins ha lura barattà brevs e rapports (...). La finala ha la direcziun padimà la situaziun, (...) puntuond ch'ins n'haja ni cuntrafatg a la norma, ni fatg in sbagl professiunal, ni agì parzialmain. Ils critics pretendevan ch'il magister midia sias deceraziuns [da 2014] en tutta furma durant in'ura da geografia, ma il directur ha refusà en num da la libertad academica dal docent.» Sin quai han trais scolasts principals dal CEC, t. a. il filosof Christian Macherel (Noréaz/FR) arranschè ina dieta d'in di intitulada «Religiun e libertad academica». «Var quaranta collegas han fatg part, docentas e docents da scienzas umanas, scienzas natiralas e dretg (...). Quai ha gidà. Lezza dispita tranter geniturs e magistraglia ha scurlattà la magistraglia (...). En il CEC datti cunzunt cuntraversas cun scolaras e scholars islamics, mintgatant era cun giudaics (...). Macherel: 'Bliers resguardan la sfera religiosa sco infallibla e la vart critica ed analitica da l'instrucziun sco privlusa (...). Nossa finamira n'è betg d'avair raschun, mabain da far patratgar a moda coerenta grazia ad auturs renconuschids.'»